

SAMOA

Faatulagaina o Aiaiga

VAEGA 1 FAATOMUAGA

1. Igoa puupuu ma le amataga
2. Faamatalaina o uiga o upu

VAEGA 2 O LE IUNIVESITE

3. Faavaeina o le Iunivesite
4. Tulaga Faaletulafono o le Iunivesite
5. O Galuega Tauave a le Iunivesite
6. Saolotoga i aoaoga tau tomai

VAEGA 3 TAGATA OFISA O LE IUNIVESITE

7. Ao o le Iunivesite
8. Faa-Ao Lagolago
9. Sui Taitaifono
10. Pule o le Iunivesite
11. Sui Pule o le Iunivesite
12. Vaitaimi o Tofiga

VAEGA 4 O LE FONOA A LE IUNIVESITE

13. Fono ina ia avea o le Vaega o Pulega
14. Tofiaina o le Fono
15. Aiaiga mo Tofiga i le Fono
16. Galuega tauave o le Fono
17. Tiute tauave o le Fono
18. Malosiaga o le Fono
19. Tuuina atu o malosiaga
20. Taulumaga o le Fono

VAEGA 5 KOMITI A LE FONOA

21. E mafai e le Fono ona tofia ni komiti
22. Komiti Faafoe ma le Komiti a le Pule o le Iunivesite
23. Faavaeina o le Senate, Komiti Tau Tomai ma Komiti Soofaatasi

24. O galuega tauave a le Senate,
Komiti Tau Tomai ma le
Komiti Soofaatasi

**VAEGA 6
TULAFONO MA TULAFONO
FAATONUTONU**

25. Tulafono
26. Tulafono Faatonutonu

**VAEGA 7
MEATOTINO MA
FAAPUTUGATUPE**

27. Tulafono o le Pulega o Tupe
a le Malo 2001
28. Faaputugatupe a le Iunivesite
29. Tupe ina ia totogiina i totonu
o Faletupe
30. Faaunegatupe ina ia totogiina
i totonu o se teugatupe e ese
mai ai
31. Faamatalaga tau tupe mautu
e tatau ona tausia
32. Fuafuaga Autasi ma Tala o
Tupe
33. Lipoti o Faatinoga o Galuega
ma Pulega
34. Lipoti Faaletausaga

35. Mauaina mai o fanua, ma isi
tulaga
36. E leai se noataga mo lafoga i
luga o tupe maua

**VAEGA 8
SOLOAIGA**

37. Soloia o le Tulafono o le
Iunivesite Aoao o Samoa
1997 ma le Tulafono o le
Aoga Faapitoa o Matata
Eseese a Samoa 1992/1993
38. O le Ao o le Iunivesite
39. Faa-Ao Lagolago
40. Sui Auai o le Fono a le
Iunivesite
41. Fono le Tumau
42. Sui auai o le Fono
43. Faafaigaluegaina o le
aufaigaluega
44. Pule o le Iunivesite
45. Fuafuaga Autasi
46. Faasaoina o le tuuina atu o
malosiaga
47. Tulafono ma tulafono
faatonutonu
Faamatalaga 1
Faamatalaga 2

2006, Nu. 2

O SE TULAFONO e tuufaatasia ai le Iunivesite Aoao o Samoa ma le Aoga Faapitoa o Matata Eseese a Samoa ina ia avea o se Aoga Faapitoa ma ia soloia ai le Tulafono o le Iunivesite Aoao o Samoa 1997 ma le Tulafono o le Aoga Faapitoa o Matata Eseese a Samoa 1992/1993. *[1 Mati 2006]*

UA FAIA e le Fono Aoao Faitulafono a Samoa i totonu o le Palemene ua potopoto e faapea:-

VAEGA 1 FAATOMUAGA

1. Igoa puupuu ma le amataga-(1) E mafai ona taua leni Tulafono o le Tulafono o le Iunivesite Aoao o Samoa 2006.

(2) O leni Tulafono e tatau ona amata faamamaluina i luga o se poloaiga a Le Ao o le Malo i le aso e faamaoti mai i totonu o le Poloaiga.

(3) O le Faasilasilaga o le amata faamamaluina o leni Tulafono e tatau ona lomia faasalalau i le gagana Samoa ma le gagana Peretania i le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o leni Tulafono, ae vagana ai ua manaomia e le mataupu se isi uiga e ese mai ai:

“Komiti Faatino Tau Tomai” o lona uiga o le Komiti Faatino Tau Tomai ua faavaeina i lalo o le fuaiupu 23(2);

“Fuafuaga Autasi” o lona uiga o se fuafuaga e pei ona manaomia e le Tulafono o le Pulega o Tupe a le Malo 2001 ma le fuaiupu 32;

“Nofoga tutotonu” o lona uiga o se nofoaga tutotonu ua faavaeina i lalo o le fuaiupu 3(7) ma e aofia ai le Nofoga tutotonu mo Aoaoga tau Samoa;

“Komiti o le Fono” e aofia ai le Senate, le Komiti Faatino Tau Tomai, le Komiti Faafae, le Komiti a le Pule ma so o se komiti, komiti faatino po o isi faalapotopotoga ua faavaeina i lalo o le fuaiupu 21;

“Fono” o lona uiga o le Fono a le Iunivesite ua faavaeina i lalo o le fuaiupu 13;

“Sui Pule” o lona uiga o se tasi o Sui Pule ua tofia i lalo o le fuaiupu 11;

“Komiti Faafae” o lona uiga o le Komiti Faafae o le Fono ua faavaeina i lalo o le fuaiupu 22;

“Tausaga faaletupe” o lona uiga o se vaitaimi e sefulu lua (12) masina e amata i le aso 1 o Iulai i so o se tausaga ma faaiuina i le aso 30 o Iuni i le tausaga e mulimuli ane ai;

“Aoga faapitoa” o lona uiga o se aoga faapitoa ua faavaeina i lalo o le fuaiupu 3(3) ma nisi aoga faapitoa e pei ona mafai ona faavaeina e tusa ai ma le fuaiupu 3(2).

“Komiti Soofaatasi o le Senate ma le Komiti Faatino Tau Tomai” o lona uiga o le Komiti ua faavaeina i lalo o le fuaiupu 23(3);

“Minisita” o lona uiga o le Minisita e fitoitonu ma Aoga mai lea taimi i lea taimi;

“Tagata Ofisa” o lona uiga o tagata ofisa o le Iunivesite, e i ai le Ao o le Iunivesite, Faa-Ao Lagolago, Sui Taitaifono, Pule ma le Sui Pule, e pei ona faamatalaina i totonu o le Vaega 3;

“Peresetene” o lona uiga o le Peresetene ma le Pule ua tofia i lalo o le fuaiupu 10;

“Faa-Ao Lagolago” o lona uiga o le Faa-Ao Lagolago o le Iunivesite ua tofia i lalo o le fuaiupu 8;

“Senate” o lona uiga o le Senate ua faavaeina i lalo o le fuaiupu 23(1);

“Tulafono” o lona uiga o so o se tulafono ua faia i lalo o le fuaiupu 25;

“Iunivesite” o lona uiga o le Iunivesite Aoao o Samoa ua faavaeina i lenei Tulafono; ma le

“Pule” o lona uiga o le Pule o le Iunivesite ua tofia i lalo o le fuaiupu 10.

(2) I le Tulafono lenei, o se faasinomaga i lē e umia se tofiga i totonu o le Iunivesite e tatau ona faitauina e faapea e aofia ai se faasinomaga i se tagata o lo o ia tauaveina i le taimi nei ia tiute tauave o lea tofiga.

(3) E leai se mea i le Tulafono lenei e puipuia ai so o se tagata mai le toe tofia, toe filifilia po o le toe faafaigaluega i so o se tofiga i lalo o lenei Tulafono pe afai ua agavaa le tagata ma ua talafeagai ona tomai i se isi itu ina ia umia lea tofiga.

(4) I le Tulafono lenei, o se faasinomaga i se galuega tauave e aofia ai se faasinomaga i se malosiaga, pule ma tiute tauave.

VAEGA 2 O LE IUNIVESITE

3. Faavaeina o le Iunivesite-(1) O lenei Tulafono ua faavaeina ai le Iunivesite Aoao o Samoa e avea o se faalapotopotoga ua tuufaatasia ai le Iunivesite Aoao o Samoa sa i ai muamua ma le Aoga Faapitoa o Matata Eseese a Samoa sa i ai muamua.

(2) O le Iunivesite e tatau ona aofia ai ia ana tagata aoga, le aufaigaluega tau tomai ma le aufaigaluega e ese mai ai, le Fono ma tagata ofisa ma ia faalapotopotoga, nofoaga tutotonu po o isi itutino ua faavaeina i lalo o lenei Tulafono ma nisi faalapotopotoga po o itutino e pei ona mafai ona faavaeina e le Fono.

(3) O le Tulafono lenei ua faavaeina ai ia faalapotopotoga nei:

(a) Le Faalapotopotoga o Aoaoga Mauualuluga; ma

(b) Le Faalapotopotoga o Tekonolosi.

(4) E tatau i le Faalapotopotoga o Aoaoga Mauualuluga, i le amataga o lenei Tulafono, ona aofia ai ia aoga ma matagaluega o le Iunivesite Aoao o Samoa sa i ai muamua e ese ai nai lo le Nofoga Tutotonu mo Aoaoga Tau Samoa, le Nofoga Tutotonu mo Aoaoga Faaauau ma Tomai Faapitoa, le kamupani Faufautua a le Iunivesite Aoao o Samoa faapea ai ia ofisa eseese o le Pulega Tau Faafoega o le Iunivesite Aoao o Samoa sa i ai muamua.

(5) E tatau i le Faalapotopotoga o Tekonolosi i le amataga o lenei Tulafono ona aofia ai ia aoga ma matagaluega o le Aoga Faapitoa o Matata Eseese a Samoa sa i ai muamua, e ese ai mai ofisa eseese o le Pulega Tau Faafoega o le Aoga Faapitoa o Matata Eseese sa i ai muamua.

(6) E tatau i le Iunivesite i le amataga o lenei Tulafono ona aofia ai foi le Ofisa o le Pule, le Nofoga Tutotonu mo Aoaoga Tau Samoa, le Nofoga Tutotonu mo Aoaoga Faaauau ma Tomai Faapitoa, le Kamupani Faufautua a le Iunivesite Aoao o Samoa faapea ai ma ofisa eseese o le Pulega Tau Faafoega o le Iunivesite Aoao o Samoa sa i ai muamua.

(7) E mafai e le Fono mai lea taimi i lea taimi, ona faavae, soloia, toe faatulaga pe toe faaigoa ia faalapotopotoga o

lo o i ai nei po o faalapotopotoga fou, nofoaga tutotonu po o isi faalapotopotoga i totonu o le Iunivesite, e pei ona aiaia i le fuaiupu 18(1).

4. Tulaga faaletulafono o le Iunivesite-(1) O le Iunivesite o se faalapotopotoga ua tuufaatasia faaletulafono ma soloaiga le motusia ma se faamau faailoga, ma e tatau ona mafai ona osia ni feagaiga, o le mauaina, umia ma le faamatuina atu o ni meatotino moni ma meatotino tau le tagata, le molia ma le faia o ni moliaga ma le faia o isi mea uma e pei ona mafai e faalapotopotoga ua tuufaatasia faaletulafono ona faia faaletulafono.

(2) O le faamau faailoga a le Iunivesite e tatau ona tausia i lalo o se puipuiga e pei ona mafai e le Fono ona faatonuina ma e faatoa mafai ona faapipiina i se pepa aloaia e tusa ai o se iugafono a le Fono po o le Komiti Faafae.

(3) O le Iunivesite o se faalapotopotoga a le Malo i lalo o le faamatalaga 4 o le Tulafono o le Pulega o Tupe a le Malo 2001 ma e noatia i manaoga o lena Tulafono.

(4) O le Iunivesite, e aofia ai ma so o se lala e umia atoa e le Iunivesite, o le a le tatau ona avea o se faalapotopotoga a le Malo i lalo o le Faamatalaga 1 o le Tulafono o Faalapotopotoga a le Malo (Faatinoga o Galuega ma le Mafai Ona Tali Atu) 2001.

5. O Galuega Tauave a le Iunivesite - O galuega tauave a le Iunivesite, i totonu o tapulaa o ana alaoa, o:

- (a) Le tuuina atu o aoga ma aoaoga, e aofia ai aoaoga tau tomiai, tomiai faapitoa ma matata mo galuega ma aoaoga faaauau i tulaga talafeagai e tali atu ai i manaoga o tagata o Samoa;
- (b) Le faavaeina o se nofoaga tutotonu e aupito sili ona lelei i suesuega i le gagana Samoa ma aganuu ma mataupu uma e faasino ia Samoa;
- (c) Le mauaina mai ma le tuuina atu o atamai e ala i le aoaoina atu, faiga faa-faufautua, aoaoga tau tulaga lautele ma suesuega;
- (d) Le uunaia o tulaga tutoatasi tau le atamai;

- (e) Le uunaia o le atinae o le tamaoaiga ma lesoifuaga lautele o tagata o Samoa; ma
- (f) Le ausia faataunuuina o sini ma faavae taiala o le Iunivesite e pei ona faatulagaina i totonu o lana Fuafuaga Autasi

6. Saolotoga i aoaoga tau tomai-(1) E tatau ona avea ma matafaioi a le Iunivesite le faamautuina e faapea o taiala faavae o saolotoga i aoaoga tau tomai ua tausia ma faaleleia.

(2) O taiala faavae o saolotoga o aoaoga tau tomai e aofia ai:

- (a) Le saolotoga o le afaigaluega faiaoga ma tagata aoga tau tomai e tusa ai ma tulafono e fesiligia ai ia atamai ma mataupu aoaoina o lo o i ai i le taimi nei, ina ia faatulai mai ni manatu fou, ma ina ia faamatala ni manatu o lo o i ai ni feeseeseaiga pe e lē o taliaina;
- (b) Le saolotoga o le afaigaluega faiaoga ma tagata aoga tau tomai i tulaga e talafeagai ai, ina ia auai i ni suesuega;
- (c) Le saolotoga o le Iunivesite e tofia ai ma tausia ana ia lava tagata faigaluega; ma
- (d) I le noatia ma le fai fuafua i lenei Tulafono ma i le Fuafuaga Autasi:
 - (i) le saolotoga o le Iunivesite ina ia faatonutonu ai ia mataupu aoaoina, ma mataupu tau aoaoga, e aoaoina i le Iunivesite; ma
 - (ii) le saolotoga o le Iunivesite ina ia aoao ma faatulaga ia tagata aoga i le faiga e pei ona ia manatu e aupito sili ona lelei e uunaia ai le aoaoina.

VAEGA 3

TAGATA OFISA O LE IUNIVESITE

7. Ao o le Iunivesite-(1) O le Ao o le faauluuluga maualuga lea o le Iunivesite ma e nafa ma le faaecina atu o tikeri ma le tuuina atu o tipiloma ma tusipasi.

(2) I le toesea o le Ao, o le Faa-Ao Lagolago o le a tatau ona faaeeina atu ia tikeri ma tuuina atu ia tipiloma ma tusipasi.

(3) I le noatia ma fai fuafua i aiaiga o lenei Tulafono, o le Ao o le Malo, i luga o le fautuaga a le Kapeneta, e tatau ona tofia le Ao o le Iunivesite mo se vaitaimi e lima (5) tausaga, ma e mafai ona toe tofia mai lea taimi o lea taimi.

(4) E mafai e le Kapeneta ona aveesea le Ao o le Iunivesite mai le tofiga mo:

- (a) Le lē faia po o le lē mafai ona faatino atoatoa ia tiute tauave o le Ao o le Iunivesite;
- (b) Amioga le pulea; po o
- (c) So o se isi mafuaaga amiotonu.

(5) E leai se mea i lenei fuaiupu e puipuia ai le Ao o le Malo mai i le tofiaina e avea o le Ao o le Iunivesite i luga o le fautuaga a le Kapeneta.

8. Faa-Ao Lagolago-(1) O le Faa-Ao Lagolago o le a tatau ona avea o le Taitaifono o le Fono.

(2) I le noatia ma le fai fuafua i aiaiga o lenei Tulafono, o le Ao o le Malo, i luga o le fautuaga a le Kapeneta, e tatau ona tofia le Faa-Ao Lagolago o ia lea e tatau ona umia le tofiga mo se vaitaimi e oo atu i le tolu (3) tausaga, ma e mafai ona toe tofia mai lea taimi i lea taimi.

(3) O le Minisita, a o le i faia se fautuaga i le Kapeneta i le tofiga o se Faa-Ao Lagolago, e tatau ona feutagai ma le Fono e faatatau i lena tofiga.

(4) E mafai e le Kapeneta ona aveese le Faa-Ao Lagolago mai le tofi mo:

- (a) le lē faia e le Faa-Ao Lagolago po o le lē mafaia e ia ona faatino atoatoa ia tiute tauave o le Faa-Ao Lagolago;
- (b) Amio le pulea; po o
- (c) so o se isi mafuaaga tatau.

9. Sui Taitaifono-(1) O le Sui Taitaifono o le Fono e tatau ona taitaifono i le Fono i le toesea ai o le Faa-Ao Lagolago.

(2) E tatau i le Fono ona filifili se tasi o ana sui auai e avea ma Sui Taitaifono mo se vaitaimi e oo atu i le tolu (3) tausaga

se i vagana faapea ua faamavae le sui auai mai le avea ma Sui Taitaifono po o ua muta ona avea o se sui auai o le Fono.

10. Pule o le Iunivesite-(1) O le Pule o le Ofisa Sili o Pulega ma Peresetene o le Iunivesite ma e tali atu i le Fono Aoao mo le pulea o mataupu tau tomai ma faafoega o mataupu o le Iunivesite.

(2) E tatau i le Fono ona tofia se Pule mo se vaitaimi e oo atu i le tolu (3) tausaga i luga o ia tuutuuga e pei ona fuafuaina e le Fono, ma e mafai ona toe tofia mai lea taimi i lea taimi.

(3) E mafai e le Fono ona aveesea le Pule mai le tofiga mo:

(a) o so o se solia o so o se tuutuuga o aiaiga o le faafaigaluegaina o le Pule;

(b) le lē faia po o le lē mafai ona faatino atoatoa ia tiute tauave a le Pule;

(c) Amioga le pulea; po o

(d) o so o se isi mafuaaga amiotonu

(4) E tatau i le Fono ona tuuina atu i le Pule le malosiaga e faafaigaluega ai, faamuta ma faia faasalaga a le aufaigaluega uma o le Iunivesite, i le noatia ma le fai fuafua i so o se tuutuuga ua faaee atu e le Fono i le tuuina atu o malosiaga.

11. Sui Pule o le Iunivesite-(1) E tatau ona i ai ia ni Sui Pule e toalua po o se isi aofai o Sui Pule e pei ona mafai ona aiaia e le Fono.

(2) O Sui Pule e tali atu i le Pule mo le pulea o aoga faapitoa ma nisi mataupu e tuuina atu ia latou e le Fono e auala atu i le Pule.

(3) E tofia ia Sui Pule mo se vaitaimi e oo atu i le tolu (3) tausaga i luga o ia tuutuuga e pei ona fuafuaina e le Pule, ma e mafai ona toe tofia mai lea taimi i lea taimi.

(4) E mafai foi ona tofia ia Sui Pule i po o e faaaauu ona umia ma tauaveina ia tofiga tau tomai i totonu o le Iunivesite faatasi ai ma a latou galuega o le avea ai o Sui Pule.

(5) E mafai e Sui Pule ona auai i le Fono e avea ma tagata e mataituina ma auai i faatalanoaga pe a talosagaina e le Fono, ae e le mafai ona palota.

(6) E mafai e le Fono, i luga o le fautuuga a le Pule o le Iunivesite ona aveesea o so o se Sui Pule mai le tofiga mo:

- (a) o so o se solia o so o se tuutuuga o le faafaigaluegaina;
- (b) le lē faia e le Sui Pule po o le lē mafai ona faatino atoatoa ia tiute tauave a le Sui Pule;
- (c) Amio le pulea; po o
- (d) o so o se isi mafuaaga amiotonu

12. Vaitaimi o Tofiga - Afai ua muta le vaitaimi o le tofiga a so o se tagata ofisa, e mafai e le itutino e faia tofiga ona malie e faapea ia faaauau e le tagata ofisa ona umia le tofiga seia oo i sea taimi e pei ona ua tofia lona sui.

VAEGA 4 O LE FONO A LE IUNIVESITE

13. Fono ina ia avea o le Vaega o Pulega - O le Fono o le vaega o pulega ma o le Komiti Faatonu o le Iunivesite ma o galuega uma po o mea ua faia i le igoa o, po o i le avea ai ma sui o, le Iunivesite faatasi ai ma le pule a, po o i le avea o se sui o, le Fono e tatau ona faatatauina e faapea sa faia e le Iunivesite.

14. Tofiaina o le Fono-(1) E tatau i le Fono ona aofia ai:

- (a) Le Faa-Ao Lagolago;
- (b) Le Pule;
- (c) Se sui o le Senate;
- (d) Se sui o le Komiti Faatino Tau Tomai;
- (e) Se sui o le aufaigaluega tau tomai ma le faiaoga e filifilia e le Pule;
- (f) Se tagata aoga o le Iunivesite po o se tagata o ia sa avea o se tagata aoga o le Iunivesite i totonu o le tasi tausaga o lona avea ai o se sui o le Fono ma e lē o se sui o le aufaigaluega a le Iunivesite;
- (g) Le Ofisa Sili o Pulega o le Matagaluega o Aoga, Taaloga ma Aganuu (po o le tagata o lo o nafa i le taimi nei mo le pulega o le Matagaluega o Aoga) po o sona sui filifilia;
- (h) Le Pule o le Iunivesite o le Pasefika i Saute po o sona sui filifilia;

- (i) Le oo atu i le toalima (5) tagata, e le o ni sui o le afaigaluega galulue tumau po o ni tagata aooga i taimi uma o le Iunivesite, e tofia e le Ao o le Malo, i luga o le fautuaga a le Minisita ina ua uma ona feutagai ma le Komiti Faafoe po o le Fono; ma
 - (j) Le oo atu i le toatolu (3) ni tagata e tofia e le Fono i lana pule faitalia.
- (2) O aiaiga ua faatulaga mai i totonu o le Faamatalaga 1 e tatau ona pulea ai ia tuutuuga o tofiga i le Fono ma le tuua o tofiga.

15. Aiaiga mo Tofiga i le Fono - O le Minisita, i le fautuaina o le Ao o le Malo i lalo o le fuaiupu 14(1)(i), ma o le Fono, le tofia o sui o le Fono i lalo o le fuaiupu 14(1)(j) ia e tatau ona amanaia ai le avea e fai ma sui o le Fono o:

- (a) Aia tau tomai faapitoa, tau pisinisi, tau alamanuia ma isi aia o tagata lautele;
- (b) Ni tagata e i ai tomai faapitoa i mataupu tau pulega;
- (c) Ni tagata o latou ia e maua ai le paleni e tusa ai o tausaga o le soifuaga ma kenera;
- (d) So o se aoga faapitoa po o faalapotopotoga lea ua avea ma lala po o ua ofi atu e faia ni sootaga ma, i le galulue faatasi ma le po o sa galulue faatasi ai i le Iunivesite.
- (e) Ia aoaoga a Ekalesia o Samoa;
- (f) Ni tagata aooga ua pasi atoatoa mai le Iunivesite;
- (g) Ni tagata nofomau o Samoa o latou ia o ni tagata ua pasi atoatoa mai isi aoga faapitoa maualuluga;
- (h) Ni tagata tau tomai ua i ai le potu masani mai fafo atu o Samoa e i ai so latou sao e faia i faiga filifiliga a le Fono.

16. Galuega Tauave a le Fono - O galuega tauave a le Fono e faapea:

- (a) Ina ia faamautuina e faapea ua faatino e le Iunivesite galuega tauave o lo o faatulaga mai i totonu o le fuaiupu 5.

- (b) Ina ia faamaonia ata muamua o le Fuafuaga Asiati ma tuuina atu mo le faamaoniga i lalo o aiaiga o le Tulafono o le Pulega o Tupe a le Malo 2001.
- (c) Ina ia faamautuina e faapea o le pulega o le Iunivesite o lo o tuusao agai i le faatinoga o lana Fuafuaga Autasi.

17. Tiute tauave o le Fono - E tatau i le Fono, i le faatinoga o ana galuega tauave i ona:

- (a) Taumafai ina ia faamautuina ua maua e le Iunivesite le tulaga aupito maualuluga o le lelei atoatoa i aoga, aoaoga ma suesuega ma, i se tulaga faapitoa e faapea ia avea le Iunivesite o se nofoaga tutotonu o le lelei atoatoa i le aoaoina o le gagana Samoa ma aganuu Samoa ma mataupu uma e faasino ia Samoa
- (b) Faia ni laasaga talafeagai ina ia faamautuina e faapea e talia e atunuu tau tomai faava o malo ia tulaga aloaia o le Iunivesite i aoga, aoaoga ma suesuega;
- (c) Ia faamautuina e faapea o taiala faavae o le saolotoga tau tomai ua faatumauina ma saga uunaia e tusa ai ma le fuaiupu 6;
- (d) Saili ina ia uunaia le atinae o le tamaoaiga ma agafesootai o tagata o Samoa;
- (e) Faavaeina o ni faiga ia e mautinoa ai ua faaaogaina tatau alaoa a le Malo;
- (f) Faamautuina ai e faapea o le Iunivesite e le faailoga tagata i so o se tagata ona o lona tupuaga, kenera, gagana, lotu, tulaga faaupufai po o isi talitonuga, tulaga tau agafesootai, nofoaga na fanau ai po o tulaga tau le aiga; ma
- (g) Tausia o se manatu mo ma le puipuia o aia a tagata lautele ma le soifua lelei o tagata aooga o le Iunivesite.

18. Malosiaga o le Fono -(1) I le noatia ma fai fuafua i lenei Tulafono, o le Fono ua i ai malosiaga uma ua manaomia i

se tulaga talafeagai ina ia mafai ai e ia ona faatino ana galuega tauave i se tulaga atoatoa.

(2) Ae vagana ai pe afai o lo o faatinoina e auala atu i se malosiaga ua tuuina atu i lalo o lenei Tulafono, o malosiaga ua taua i lalo e tatau ona tauaveina e na o le Fono:

- (a) Le tuuina atu o polokalame ma mataupu o aoga po o aoaoga;
- (b) Le faaulufaleina o tagata aoga ma le tuuina atu o faailoga;
- (c) Le tuuina atu o felosipi, sikolasipi, faailoga tau tupe, po o togi;
- (d) Le iloiloina o ni talosaga e faatatau i le faamutaina o tofiga po o le faafoeina itu tau i amio a le aufaigaluega tau tomai ma isi tagata faigaluega ma tagata aoga e le Pule o le Iunivesite.
- (e) Le taliaina o meaalofa ma mavaega ua faia i le Iunivesite, po o e ala i se faiga faatausi mavaega po o se isi faiga e ese ai;
- (f) Le sueina o tupe ma le mauaina mai o ni saofaga i faaputugatupe a le Iunivesite;
- (g) Le faatagaina o le faia o ni tupe faameaalofa mai i tupe a le Iunivesite i le Pule, i sui o le aufaigaluega po o tagata aoga o le Iunivesite; po o i so o se faalapotopotoga a le aufaigaluega po o tagata aoga, i luga o ni aiaiga ma ni tuutuuga e pei ona manatu le Fono ua talafeagai ai;
- (h) Le faatulagaina mo le tuuina atu (pe i luga o se faatauga po o se isi faiga e ese ai) o ni oloa ma auaunaga i le aufaigaluega ma tagata aoga a le Iunivesite po o isi tagata o lo o faaaogaina ia nofoaga o le Iunivesite;
- (i) Le teu faafaigaluegaina o so o se faaputugatupe faasino i po o ua umia e le Iunivesite;
- (j) Le faavaeina faiga faa tausi mavaega, kamupani po o isi faalapotopotoga ua tuufaatasia faaletulafono, e pei ona ia manatu ua talafeagai ai ina ia uunaia ai sini ma manaoga o le Iunivesite;

- (k) Le auai ai i le atiaeina faapisinisi o so o se sailiiliga ua maua, fausaga fou po o lomiga faasalalau po o o so o se meatotino tau le atamai lea o lo o i ai se aia po o manaoga o le Iunivesite;
- (l) Le faaeina atu o, totogifuapauina, tau faaee atu, ma faasalaga tupe;
- (m) Le faavaeina po o le toe faamaapeina ma le tausia o faalapotopotoga, nofoaga tutotonu, lala, kolisi ma isi itutino o le Iunivesite, i totonu o le Iunivesite ma isi nofoaga;
- (n) Le fuafuaina o aiaiga ma tuutuuga e mafai ai e so o se faalapotopotoga po o itutino ona auai ai i totonu o le Iunivesite, ulufale atu i fesootaiga po o le galulue faatasi ai ma le Iunivesite po o ua tuufaatasia ai faaetulafono i totonu o le Iunivesite; ma
- (o) Le faia o so o se mea e talafetaui i le faatinoina o so o se malosiaga ua faaee atu i ai e ala i lenei fuaiupu.

(3) I le noatia ma le fai fuafua i le faafuaiupu (2) ma e ui lava i le fuaiupu 4(1), e lē tataui i le Fono ona faatinoina ia malosiaga ua taua i lalo e aunoa ma le maliega tusitusia a le Minisita:

- (a) Le faatau atu po o le lafoaia i se isi faiga e ese ai o meatotino po o aia i luga o meatotino a le Iunivesite;
- (b) Le mokesi po o le faaaitalafuina i se isi faiga e ese ai o meatotino po o aia i luga o meatotino a le Iunivesite; ma
- (c) Le tuuina atu po o le ulufale atu i ni faiga faalisi o fanua po o fale po o vaega o fale o le Iunivesite.

(4) E mafai e le Iunivesite ona nono mai ni tupe, pe i luga o se faiga faaaitalafu po o se isi faiga e ese ai, i totonu o ni tapulaa po o i luga o nisi aiaiga e tusa ai ma tulaga e faamau ai ia nonogatupe po o i se isi faiga e ese ai e pei ona mafai e le Minisita ona faamaonia, i luga o le fautuaga a le Ofisa Sili o Pulega o le Matagaluega o Tupe.

19. Tuuina atu o malosiaga-(1) E mafai e le Fono i luga o se iugafono, mai i lea taimi i lea taimi, i luga o se tulaga lautele po o se tulaga faapitoa, ona tuuina atu ia malosiaga i le Pule po o i so o se Komiti o le Fono se isi o ana galuega tauave i lalo o lenei Tulafono (e ese ai nai lo malosiaga mo le tofia o se Pule ma le faia o tulafono) po o so o se isi Tulafono.

(2) E mafai e le Pule po o so o se isi Komiti o le Fono ona tuuina atu i se faiga tusitusia ni galuega tauave ua tuuina atu ia latou e le Fono i se sui o le afaigaluega a le Iunivesite po o i se isi Komiti.

(3) I le noatia ma fai fuafua i so o se faatonuga lautele pe faapitoa ua tuuina atu po o ni aiaiga ua faaee atu e le Fono po o le Pule, po o le a lava le tulaga e faaono i ai, o se Komiti o le Fono po o se sui o le afaigaluega a le Iunivesite lea ua tuuina atu i ai so o se galuega tauave i lalo o lenei fuaiupu e mafai ona faatinoina ia galuega tauave i le faiga tutusa faatasi ai ma le taunuuga tutusa e peiseai na faaeeina atu ia galuega tauave i le Komiti po o se sui o le afaigaluega i se faiga tuusao e lenei Tulafono ae le o auala atu i le faiga e tuuina atu ai malosiaga.

(4) O so o se tuuina atu o malosiaga ua faia i lalo o lenei fuaiupu e le aafia pe taofia ai le faatinoina o so o se galuega tauave e le Fono po o le Pule, po o le a lava le tulaga e faaono i ai, po o, e aafia ai le matafaioi a le Fono po o le Pule mo ni gaoioiga a so o se tagata ua faia i lalo o le faiga o le tuuina ai malosiaga.

(5) O se tuuina atu ni malosiaga i lalo o lenei fuaiupu e mafai ona faalēaogāina i so o se taimi i se faiga tusitusia ma, e faaauau pea ona faamamaluina e tusa ai ma lona faamoemoe seia oo ina ua faalēaogāina.

20. Taulumaga o le Fono - O aiaiga ua faatulaga mai i totonu o le Faamatalaga 2 e tatau ona pulea ai taulumaga o le Fono.

VAEGA 5 KOMITI A LE FONO

21. E mafai e le Fono ona tofia ni Komiti-(1) E mafai e le Fono mai lea taimi i lea taimi ona faavaeina ni Komiti,

Komiti Faatino po o nisi itutino e aofia ai ni tagata, pe o ni sui o le Fono pe leai foi, e pei ona fuafuaina e le Fono e faatino ai ni malosiaga e pei ona ua tuuina atu ia i latou i lalo o le fuaiupu 19 po o ua faaee atu ia i latou e se tulafono.

(2) E tatau ona avea le Pule o le Iunivesite ma se sui o Komiti uma, Komiti Faatino po o itutino ua faavaeina e le Fono.

22. Komiti Faafoe ma le Komiti a le Pule o le Iunivesite-(1) E tatau i le Fono ona faavae se Komiti Faafoe a le Fono e tauaveina ni malosiaga e avea ai ma sui o le Fono e pei ona tuuina atu e le Fono.

(2) E tatau i le Komiti Faafoe ona aofia ai ia le itiiti ifo nai le tovalu sui o le Fono.

(3) E tatau i le Fono ona faavaeina se Komiti a le Pule e fautuaina le Pule o le Iunivesite.

(4) O sui auai ma galuega tauave a le Komiti Faafoe ma le Komiti a le Pule o le Iunivesite e tatau ona faatonuina e ala i tulafono.

23. Faavaeina o le Senate, Komiti Tau Tomai ma Komiti Soofaatasi-(1) E tatau i le Fono ona faavaeina se Senate e aofia ai le Pule, Sui Pule (Aoaoga Mauululuga) se sui o le Nofoga Tutotonu mo Aoaoga Tau Samoa ma ni sui o le afaigaluega ma tagata aoga o le Aoga Faapitoa o Aoaoga Mauululuga e pei ona aiaia i tulafono talafeagai.

(2) E tatau i le Fono ona faavaeina se Komiti Tau Tomai e aofia ai le Pule, Sui Pule (Tekonolosi) ma ni sui o le afaigaluega ma tagata aoga o le Aoga Faapitoa o Tekonolosi e pei ona aiaia i tulafono talafeagai.

(3) E tatau i le Fono ona faavaeina se Komiti Soofaatasi o le Senate ma le Komiti Tau Tomai e aofia ai le Pule, o Sui Pule, se sui o le Nofoga Tutotonu mo Aoaoga Tau Samoa ma sui o le Senate ma le Komiti Tau Tomai e pei ona aiaia i tulafono talafeagai.

(4) O le Pule o le Iunivesite e tatau ona avea ma taitaifono o nei Komiti, ae mafai ona tuuina atu le taitaifono i Sui Pule talafeagai i totonu o le Senate ma le Komiti Tau Tomai.

24. O galuega tauave a le Senate, Komiti Tau Tomai ma le Komiti Soofaatasi-(1) O galuega tauave a le Senate ma le Komiti Tau Tomai e aofia ai le:

- (a) Fautuaina o le Fono i luga o mataupu e faasino i polokalame ma mataupu o aoga ma aoaoga, faailoga ma isi mataupu tau tomai i totonu o a latou aoga faapitoa; ma
 - (b) Faatinoina o malosiaga ua tuuina atu ia i latou e le Fono.
- (2) O galuega tauave a le Komiti Soofaatasi ma le Komiti Tau Tomai e aofia ai le:
- (a) Fautuaina o le Fono i luga o mataupu tau tomai ia e aafia ai ia aoga faapitoa e lua (2), ma i se tulaga faapitoa ia faafaigofie ma uunaia ai ina ia mafai ai e tagata aooga mai aoga faapitoa taitasi ina ia faasee ese atu mataupu aoaoina ma le tulaga o le aloaia o faailoga i le va o aoga faapitoa, ina ia alofia ai le toe faia o mataupu aoaoina ma ina ia faafaigofie ai le fegasoloai o le aufaigaluega i le va o ia aoga faapitoa; ma
 - (b) Faatinoina o malosiaga ua tuuina atu i ai e le Fono.
- (3) E lē tatau i le Fono ona faia se faaiuga po o tulafono e tusa ai o so o se mataupu tau tomai ua taua i totonu o le faafuaiupu (1) sei vagana sa ia talosagaina le fautuaga a le Senate po o le Komiti Tau Tomai ma ia iloiloaina so o se fautuaga ua tuuina atu e le Senate po o le Komiti Tau Tomai.
- (4) E aunoa ma le faaitiitia o le taua mai i tiute o le Fono i lalo o le faafuaiupu (3), o se faaiuga po o se tulafono ua faia e le Fono e le tatau ona faapea ua le aloaia talu ai e faapea ua le tausisia e le Fono lena faafuaiupu.

VAEGA 6

TULAFONO MA TULAFONO FAATONUTONU

25. Tulafono-(1) E mafai e le Fono ona faia ni tulafono, e ogatasi ma lenei Tulafono, e pei ona ua manatu ua talafeagai ai po o ua tatau mo le faafoeina o mataupu o le Iunivesite.

(2) E aunoa ma le faatapulaaina o tulaga lautele o le faafuaiupu (1), e mafai e le Fono ona faia ni tulafono e tusa ai o:

- (a) Le pulega, pulega lelei ma le tulaga tau i amio pulea a le Iunivesite;
- (b) Le faaeeina atu, e po o e avea ai ma sui o le Fono, o ni faasalaga i luga o le aufaigaluega po o tagata aooga o le Iunivesite mo le faalavelaveina o po o le lē usitaia o se tulafono e tusa ai o se mataupu e pei ona ua taua i totonu o le parakalafa (a);
- (c) Le faavae, galuega tauave ma taualumaga a le Komiti Faafoe, Senate, Komiti Tau Tomai, Komiti Soofaatasi o le Senate ma le Komiti Tau Tomai ma isi komiti ua faavaeina e le Fono;
- (d) Le faavaeina o aoga faapitoa, mataupu o le Iunivesite, aoga, matagaluega, nofoaga tutotonu po o isi vaega i totonu o le Iunivesite;
- (e) Le faaigoaina o sui o le aufaigaluega o le Iunivesite e pei o le aufaigaluega tau tomai, tau aooga, faiga tutusa, aufaigaluega lautele, tagata faigaluega le tumau, tagata faigaluega tumau ma tagata faigaluega faavaitaimi po o isi e ese mai ai;
- (f) Aiaiga ma tuutuuga o le faafaigaluegaina o sui o le aufaigaluega a le Iunivesite;
- (g) Le ulufale atu mo le faaaaina i totonu, ma le aveesea mai i polokalame po o mataupu tau aooga;
- (h) Polokalame ma mataupu tau aooga ua tuuina atu e le Iunivesite ma taualumaga mo le iloiloaina o faatinoga a tagata aooga i na polokalame ma mataupu tau aooga;
- (i) Tikeri, tipiloma, tusipasi po o isi faailoga e mafai ona tuuina atu e le Fono ma tulaga manaomia e tusa ai ma ia faailoga;
- (j) Le tuuina atu o pasi i mataupu, faaaogaina o pasi i mataupu, ma tuusaunoaga i tagata aooga o le Iunivesite e tusa ai o se mataupu po o ni mataupu o lo o tuliloaina e i latou ma faamaeaina po o i totonu o se isi faalapotopotoga tau Iunivesite po o e auala atu i aooga faaopopo po o aooga i luga o fesootaiga mamao ua faavanoaina mai mo na faailoga;

(k) Le tuuina atu o faiga tau inisiua, supaaneueata po o faamanuiaga mo faamalologa litaea mo, po o e tusa ai o, le Pule po o sui o le aufaigaluega o le Iunivesite; ma

(l) So o se isi mataupu e manaomia po o faatagaina e lenei Tulafono ina ia aiaia ai e le tulafono.

(3) Afai ua faia e le Fono se tulafono i lalo o le faafuaiupu (2)(b) e aiaia ai mo le faaeeina atu o ni faasalaga i luga o tagata faigaluega po o tagata aoga o Iunivesite, e tatau i le tulafono ona aiaia ai mo le Fono, pe afai e talosagaina e se sui o le aufaigaluega po o se tagata aoga o ia lea ua faaeeina atu i ai se faasalaga, ina ia toe iloiloaina, pe faatulaga mo le toe iloiloaina le faaeeina atu o le faasalaga, le aofai o le faasalaga, po o ia mea uma e lua.

(4) O so o se faiga po o taualumaga tau iloiloga ua faavaeina i lalo o se tulafono e le Iunivesite ina ia iloiloaina se talosaga ua faia i lalo o le faafuaiupu (3) o lenei fuaiupu e tatau ona faia e tusa ai ma tulafono o faamasinoga tonu.

26. Tulafono Faatonutonu-(1) E mafai e se tulafono ona tuuina atu le malosiaga i le Fono, so o se komiti o le Fono po o so o se tagata ofisa o le Iunivesite e faia ai ni Tulafono Faatonutonu po o tulafono faafoe (e ogatasi ma lenei Tulafono po o so o se tulafono) e aiaia ai mo le faatonutonuina o so o se mataupu e mafai ai ona faia se tulafono, e ese mai ai nai lo le faaeeina atu o faasalaga i lalo o le fuaiupu 25(2)(b).

(2) O so o se tulafono faatonutonu ua faia e tusa ai o le faafuaiupu (1) o lenei fuaiupu e tatau ona i ai le malosi ma le taunuuga tutusa e pei o se tulafono, ma e mafai, mai lea taimi i lea taimi, ona toe teuteu pe soloia e le Fono po o e le Komiti a le Fono po o le tagata ofisa a le Iunivesite ua i ai le malosiaga e faia ai na tulafono faatonutonu.

(3) E mafai foi e so o se komiti po o se tagata ofisa o le Iunivesite ona faalauiloaina aloaia ia tulafono faafoe, taiala po o faiga faavae ia e le o faamalasia e le tulafono ae peitai e ogatasi ma le tulafono po o so o se tulafono po o tulafono faatonutonu ma o lea e le o faaeeina atu ai se faasalaga.

VAEGA 7
MEATOTINO MA FAAPUTUGATUPE

27. Tulafono o le Pulega o Tupe a le Malo 2001 - E tatau ona faaaogaina le Vaega 13 o le Tulafono o le Pulega o Tupe a le Malo 2001 i le Iunivesite.

28. Faaputugatupe a le Iunivesite - O faaputugatupe a le Iunivesite e tatau ona aofia ai:

- (a) Tupe uma e mauaina e le Iunivesite mai tupe e faatatauina e le Fono Faitulafono mo faamoemoega o le Iunivesite;
- (b) Tupe uma e faapea e ono foai, tuuina mai po o saofaga mai i le Iunivesite po o e faapea e ono totogiina mai faaletulafono i se isi faiga e ese ai i le Iunivesite;
- (c) Tupe uma e mauaina e le Iunivesite e auala mai i totogifuapauina po o i se isi faiga e ese mai ai e tusa ai ma le faatinoina ma le tauaveina o so o se matafaioi a le Iunivesite; ma
- (d) Tupe tului uma ma isi tupe faaputupu a le Iunivesite.

29. Tupe ina ia totogiina i totonu o faletupe-(1) O tupe uma ua mauaina e le Iunivesite e tatau, i se taimi vave lava e mafai ai ina ua uma ona tuuina atu i lima o tagata ofisa talafeagai o le Iunivesite, ona totogiina i totonu o le faletupe i se teugatupe po o ni teugatupe a le Iunivesite e pei ona o le a fuafuaina e le Fono mai lea taimi i lea taimi.

(2) E leai se tupe e tatau ona talaina i tua mai le faletupe vagana ai i luga o le pule faataga a le Fono ma i ni tupe siaki e sainia e se tagata faigaluega a le Iunivesite ua faamaonia e le Fono, ma toe sainia e se sui o le Fono po o e se isi tagata ofisa po o tagata faigaluega o le Iunivesite ua faamaonia e le Fono.

(3) I totonu o lenei fuaiupu, “tagata ofisa talafeagai” o lona uiga o so o se tagata ua filifilia i se faiga tusitusia e le Pule po o le Sui Pule e na te tagofia tupe uma ua maua e le Iunivesite mai lea taimi mai lea taimi.

30. Faaunegatupe ina ia totogiina i totonu o se teugatupe e ese mai ai - O tupe uma ua nonoina mai e le Fono e avea ai ma sui o po o mo faamoemoega o le Iunivesite, e ese mai ai nai lo tupe nonoina faa-aitalafu, e tatau ona totogiina i totonu o se teugatupe e ese mai i le igoa o lo o faia ai le faaunegatupe, ma e le tatau ona talaina mai i le faletupe po o le faaaluina seia vagana ai mo ni faamoemoega maoti lea na nonoina mai ai lea tupe.

31. Faamatalaga tau tupe mautu e tatau ona tausia - E tatau i le Fono:

- (a) Ona poloaia ina ia tausia ni faamatalaga tau tupe mautu ma faamaumauga o galuega ma mataupu a le Iunivesite ina ia tusa ai ma manaoga o le fuaiupu 103 o le Tulafono o le Pulega o Tupe a le Malo 2001 po o so o se suiga e faia i lena aiaiga;
- (b) Faia mea uma e talafeagai ina ia faamautu ai e faapea o lo o tausia e le Iunivesite le pulea atoatoa o ana meatotino, po o o lo o i lalo o puipuibigamalu a le Iunivesite; ma
- (c) Faamautuina e faapea o lo o pulea lelei ia tulaga o le faatupulaia o noataga.

32. Fuafuaga Autasi ma Tala o Tupe - I le amata faamamaluina o lenei Tulafono, e tatau i le Pule o le Iunivesite ona saunia mo le faamaoniga a le Fono, se Fuafuaga Autasi ma Tala o Tupe e tusa ai ma le fuaiupu 92 o le Tulafono o le Pulega o Tupe a le Malo 2001 ina ia tuuina atu i le Ofisa Sili o Pulega o le Matagaluega o Tupe i totonu o le tolu (3) masina a o le i faaiuina le isi tausaga faaletupe e sosoo mai ai.

33. Lipoti o Faatinoga o Galuega ma Pulega-(1) E tatau i le Pule o le Iunivesite ona saunia, mo le faamaoniga a le Fono, se Lipoti o le Faatinoga o Galuega ma Pulega ma faamatalaga tau tupe ina ia tusa ai ma le fuaiupu 104 o le Tulafono o le Pulega o Tupe a le Malo 2001, ina ia tuuina atu i le Minisita ma le Minisita o Tupe i totonu o le fa masina mai le faaiuga o le tausaga faaletupe.

(2) E tatau ona aofia ai i totonu o Faamatalaga Tau Tupe ia faamatalaga eseese o tupe mama ma tupe gau ma faamatalaga o paleni o tupe ma faamatalaga e lagolago ai, o ia mea uma e tatau ona faamaonia e le Fono ma sainia e avea ai ma sui o le Fono e le Faa-Ao Lagolago po o se isi tagata ua tofia e le Fono.

(3) E tatau ona sueina faasuetusi faamatalaga tau tupe a le Iunivesite e le Pule ma Suetusi Sili a le Malo o Samoa po o, i le maliega a le Pule ma Suetusi Sili, e se isi suetusi faamaonia.

(4) O le taimi lava e maea ai ona sueina faasuetusi ia faamatalaga tau tupe a le Iunivesite e tatau i le Fono ona auina atu se ata o faamatalaga tau tupe, faatasi ai ma se ata o so o se lipoti ua faia e le suetusi, i le Kapeneta.

(5) E tatau i le Minisita ona poloaia ni ata o le faamatalaga tau tupe ua maea ona sueina faasuetusi ma so o se lipoti ua faia e le suetusi ina ia faataatia i luma o le Fono Aoa o Faitulafono i totonu o le luasefulu valu (28) aso talu ona mauaina se ata e le Minisita pe afai o tauaofia i lena taimi le Fono Aoa o Faitulafono po o, pe afai e leai, i totonu o le luasefulu valu (28) o le isi tauaofiaga e sosoo ai.

34. Lipoti Faaletausaga-(1) I le faaopoopo atu i le Lipoti o le Faatinoga o Galuega ma Pulega, e tatau i le Fono, i se taimi vave lava e mafai ai ina ua tuanai le faaiuga o tausaga faatupe taitasi, ona faia se lipoti i le Minisita i gaoioiga a le Iunivesite a o faagasolo lena tausaga faaletupe, e aofia ai se faamatalaga o tulaga ua ausia o sini o lo o faatulaga mai i totonu o le Fuafuaga Autasi.

(2) E tatau i le Minisita ona poloaia ni ata o ia lipoti uma ina ia faataatia i luma o le Fono Aoa o Faitulafono i totonu o le luasefulu valu (28) aso ina ua tuanai le mauaina e ia o le ata pe afai o lo o tauaofia le Fono Aoa o Faitulafono i lea taimi po o, afai e leai, i totonu o le luasefulu valu (28) aso ina ua tuanai le amataga o le tauaofiaga e sosoo ai.

35. Mauaina mai o fanua ma isi tulaga-(1) E ui lava i so o se aiaiga i so o se isi tulafono, ua faatagaina nei le Komiti Faatino o Eleele;

(a) Ina tuuina atu po o le faaliliuina atu i le Iunivesite, mo faamoemoega o lenei Tulafono, se esetete

umia saoloto i fanua tau i le Malo e pei ona o le a malilie i ai i le va o le Malo ma le Iunivesite, faatasi ai ma so o se faaleleiga i luga o sea fanua, i ni tuutuuga e pei ona o le a malilie i ai i le va o le Malo ma le Iunivesite; ma

- (b) Ina ia tuuina atu i le Iunivesite, mo faamoemoega o lenei Tulafono, se lisi i luga o sea fanua tau le Malo e pei ona o le a malilie i ai i le va o le Malo ma le Iunivesite, faatasi ai ma so o se faaleleiga i luga o sea fanua, i luga o ni tuutuuga e pei ona o le a malilie i ai i le va o le Malo ma le Iunivesite.

(2) E ui lava i aiaiga i so o se isi tulafono, o le vaitaimi o so o se lisi ua tuuina atu i lalo o le faafuaiupu (1)(b) e tataua ona faamutaina e le sili atu na i lo le valusefulu (80) tausaga ina ua tuanai le aso na amata ai le lisi.

36. E leai se noataga mo lafoga i luga o tupe maua - O tupe mama a le Iunivesite, i le a lava le tulaga e maua ai, e le tataua ona noatia i lafoga i luga o tupe maua mo faamoemoega o le Tulafono o Lafoga o Tupe Maua 1974.

VAEGA 8 SOLOAIGA

37. Soloia o le Tulafono o le Iunivesite Aoao o Samoa 1997 ma le Tulafono o le Aoga Faapitoa o Matata Eseea a Samoa 1992/1993-(1) Ua soloia le Tulafono o le Iunivesite Aoao o Samoa 1997 ma le Tulafono o le Aoga Faapitoa o Matata Eseea a Samoa 1992/1993.

(2) O le Fono a le Iunivesite Aoao o Samoa, ma le Fono a le Aoga Faapitoa o Matata Eseea a Samoa, e pei ona faavaeina i le taimi lava lea a o lumanai ai le soloia o Tulafono ua taua i luga, ua faataapeina nei.

(3) I le noatia ma le fai fuafua i aiaiga o lenei Tulafono, o tagata o lo o umia tofi e avea ai o ni sui o Fono e lua i le taimi lava lea a o lumanai ai le soloia o Tulafono ua faamutaina le umia o tofi e avea ai ma sui.

(4) I isi tulaga uma, o le Iunivesite ua faaauau ai lea o le Iunivesite Aoao o Samoa ma le Aoga Faapitoa o Matata Eseese a Samoa.

(5) O meatotino uma ma noataga a le Iunivesite Aoao ua umia e tusa ai o le Tulafono o le Iunivesite Aoao o Samoa 1997 ma le Aoga Faapitoa o Matata Eseese i lalo o le Tulafono o le Aoga Faapitoa o Matata Eseese a Samoa 1992/1993 ua faaliliuina atu i le Iunivesite Aoao o Samoa.

(6) So o se tupe faatatauina po o isi tupe maua e mafai ona totogiina i le Iunivesite Aoao o Samoa e pei ona faavaeina i lalo o le Tulafono o le Iunivesite Aoao o Samoa 1997 po o le Aoga Faapitoa o Matata Eseese a Samoa e pei ona faavaeina i lalo o le Tulafono o le Aoga Faapitoa o Matata Eseese a Samoa e tataua ona totogi atu i le Iunivesite.

38. O le Ao o le Iunivesite - E ui lava i so o se mea i totonu o lenei Tulafono, o le Ao o le Malo o lo o i ai i le taimi nei, o ia lea o le tagata sa umia le tofi e avea ai o le Ao o le Iunivesite e ala i le tofi a o lumanai ai le faamamaluina o lenei Tulafono:

- (a) E tumau pea ona avea o le Ao o le Iunivesite; ma
- (b) E faaauau pea lona umia o le tofi mo se vaitaimi e lima (5) tausaga mai le aso na amata faamamaluina ai lenei Tulafono (ae vagana ai ua vave faamavae po o ua faamutaina lona avea ma Ao o le Malo).

39. Faa-Ao Lagolago-(1) E ui lava i so o se mea i totonu o lenei tulafono o le Minisita o ia lea o le tagata sa umia le tofi o le faa-Ao Lagolago o le Iunivesite Aoao o Samoa a o lumanai ai le faamamaluina o lenei Tulafono:

- (a) E tumau pea ona avea o le Faa-Ao Lagolago o le Iunivesite; ma
- (b) E faaauau pea lona umia o le tofi mo se vaitaimi e tolu (3) tausaga mai le aso e amata faamamaluina ai lenei Tulafono (ae vagana ai ua vave faamavae i lona tofi o le Faa-Ao Lagolago po o ua faamuta lona avea ma Minisita).

40. Sui Auai o le Fono a le Iunivesite-(1) O tagata o i latou ia, i le taimi lava lea a o lumanai le amata faamamaluina o lenei Tulafono, sa avea o sui o le Fono a le Iunivesite Aoao o Samoa i lalo o le Tulafono o le Iunivesite Aoao o Samoa 1997 po o le Fono o le Aoga Faapitoa o Matata Eseese a Samoa i lalo o le Tulafono o le Aoga Faapitoa o Matata Eseese a Samoa 1992/1993 o le a tatau ona faamuta le avea ma sui o le Fono ma le Aoga Faapitoa o Matata Eseese i le taimi e amata faamamaluina lenei Tulafono.

(2) E le taofia i le faafuaiupu (1) so o se tagata o ia lea sa avea ma sui o ia Fono a o le i amata faamamaluina lenei Tulafono mai lona toe tofiaina, po o i lona tulaga o lo o i ai i le taimi nei po o i se isi tulaga, i le Fono a le Iunivesite i lalo o lenei Tulafono.

41. Fono le Tumau-(1) Mo le faamoemoe ina ia mafai ona tofia se Pule o le Iunivesite, e tatau ona tuufaatasia se Fono le tumau pe a pasia lenei Tulafono a o lumanai ai le amata faamamaluina e ala i se Poloaga a le Ao o le Malo.

(2) E tatau ona aofia ai:

- (a) Le Faa-Ao Lagolago;
- (b) Se tagata ua filifilia o le Senate i lalo o le Tulafono o le Iunivesite Aoao o Samoa 1997 e filifilia e le Senate;
- (c) Se tagata ua filifilia e le Komiti Tau Tomai i lalo o le Tulafono o le Aoga Faapitoa o Matata Eseese a Samoa 1992/1993 e filifilia e le Komiti Tau Tomai;
- (d) O le Ofisa Sili o Pulega o le Matagaluega o Aoga, Taaloga ma Aganuu;
- (e) O le Pule o le Iunivesite o le Pasefika i Saute; ma
- (f) E oo atu i le lima (5) tagata ua tofia e le Ao o le Malo, e faia i luga o le fautuaga a le Minisita, i le amanaia ai o aiaiga o lo o faatulaga mai i totonu o le fuaiupu 15.

(3) E tatau ona fono le Fono le tumau ini taimi ma ni nofoaga e pei ona fuafuaina e le Minisita i se faiga tusitusia mai i lea taimi i lea taimi, i luga o le tulaga e faapea o le fonotaga

muamua a le Fono le tumau e le tatau ona faia ina ua tuanai le masina e tasi (1) talu ona pasia lenei Tulafono e le Palemene.

(4) O le taualumaga o so o se fonotaga a le Fono le tumau e tatau ona pulea i ni tulafono faafoe e pei ona mafai ona fuafuaina e le Fono le tumau mai i lea taimi i lea taimi.

(5) E tatau ona avea ma matafaioi a le Fono le tumau le tofiaina o se Pule o le Iunivesite faapea ai ma mataupu e manaomia i le faamamaluina o lenei Tulafono, ae i isi uma tulaga o le Fono ua faavaeina i lalo o le Tulafono o le Iunivesite Aoa o Samoa 1997 ma le Tulafono o le Aoga Faapitoa o Matata Esee a Samoa 1992/1993 e tatau ona faaauau ona faagaioia seia oo ina ua faamamaluina atoatoa ma faataunuina lenei Tulafono

42. Sui Auai o le Fono-(1) Mo le na o le faamoemoe ina ia mafai ai ona faavaeina loa le Fono i le taimi e amata faamamaluina ai lenei Tulafono, e mafai e le Minisita, e ala i se faasilasilaga tusitusia, ona faatonu e faapea ni tagata ua faaalua manino e tatau ona avea ma sui o le Fono, o ia tagata taitasi uma ina ia avea ma sui o se tasi o manaoga ua taua mulimuli mai i le Fono seia oo ina ua filifilia se sui talafeagai o le Fono i lalo o aiaiga o se tulafono e pei ona aiaia i totonu o le fuaiupu 1(c) o le faamatalaga muamua;

- (a) O le Senate, ina ia avea ma ona sui o le aufaigaluega tau tomai o ia lea sa avea ma sui o le Senate a o le i amata faamamaluina lenei Tulafono;
- (b) O le Komiti Tau Tomai o le Iunivesite, ina ia avea ma ona sui se tagata o le aufaigaluega tau tomai o le Aoga Faapitoa o Matata Esee a o le i amata faamamaluina lenei Tulafono;
- (c) O tagata aoga o le Iunivesite, ina ia avea mo latou sui se tagata aoga o ia lea sa avea ma tagata aoga i le Iunivesite Aoa o Samoa po o le Aoga Faapitoa o Matata Esee a Samoa i totonu o le sefulu lua (12) masina ma e le o ia o se sui o le aufaigaluega a le Iunivesite;
- (d) O sui ia o le Fono le tumau ua tofia e le Ao o le Malo e tusa ai ma le fuaiupu 41(2)(f).

(2) So o se tagata ua tofia e avea o se sui o le Fono i lalo o le faafuaiupu (1) e le tatau ona tumau pea ona avea ma sui o le Fono i lalo o lena faafuaiupu mo se vaitaimi e sili atu nai lo le tasi (1) le tausaga se i vagana ai ua filifilia pe tofia mulimuli ane lena tagata i lalo o se tulafono talafeagai.

43. Faafaigaluegaina o le afaigaluega – O se tagata o ia lea, i le taimi lava lea a o le i amata faamamaluina lena Tulafono, sa avea ma sui o le afaigaluega o le Iunivesite Aoao o Samoa po o le Aoga Faapitoa o Matata Eseese a Samoa e tatau, ina ua tuanai le amata faamamaluina o le Tulafono ona faaauau ona faafaigaluegaina i le Iunivesite i luga o aiaiga ma tuutuuga tutusa e pei ona sa faafaigaluegaina ai i le taimi lava lea a o lumanai ai le amata faamamaluina seia oo ina faamutaina le galuega a lena tagata po o ua toe faafouina e tusa ai ma ia aiaiga ma tuutuuga.

44. Pule o le Iunivesite-(1) I le pasia ai o lena Tulafono, a o lumanai ai lona amata faamamaluina e ala i se Poloaiiga a le Ao o le Malo, e tatau i le Fono le tumau a le Iunivesite ona tofia se Pule o le Iunivesite, e pei ona aiaia i le fuaiupu 10 o lena Tulafono.

(2) Seia oo ina ua amata faamamalu lena Tulafono ma i le noatia ma le fai fuafua i so o se faaiuga a le Fono le tumau a le Iunivesite, o le Pule ua tofia i lalo o le Tulafono o le Iunivesite Aoao o Samoa 1997 e tatau ona faaauau ona galue e avea o le Ofisa Sili o Pulega o le Iunivesite.

45. Fuafuaga Autasi-(1) E tatau i le Fono, i totonu o le tausaga e tasi (1) o lana fonotaga muamua, ona saunia ma faaoo atu i le Minisita mo lana faamaoniga se Fuafuaga Autasi ua fuafuaina mo le Iunivesite lea e tatau ona fesootai i galuega a le Aoga Faapitoa, Nofoga Tutotonu mo Suesuega tau Samoa ma isi itutino o le Iunivesite.

(2) A o lumanai ai le faamaoniga o se Fuafuaga Autasi fou e tasi, o fuafuaga autasi ma faavae tusitusia o le Iunivesite Aoao o Samoa ma le Aoga Faapitoa o Matata Eseese a Samoa e tatau ona faaauau ona faamamaluina, i le noatia ma le fai fuafua i teuteuga i pei ona talafeagai mo le faamoemoe o le faavaeina o

le Iunivesite ma noatia i so o se teuteuga e pei ona fautuaina e le Fono ma faamaonia e le Minisita mai i lea taimi i lea taimi.

46. Faasaoina o le tuuina atu o malosiaga – So o se faiga e tumau ai malosiaga ua faia faapea sa faia e le Fono a le Iunivesite Aoao o Samoa i lalo o le Tulafono o le Iunivesite Aoao o Samoa 1997 po o le Tulafono o le Aoga Faapitoa o Matata Eseese a Samoa 1992/1993 e tatau ona avea e faapea o se faiga e tuuina atu ai malosiaga na tuuina atu i lalo o lenei Tulafono e le Fono.

47. Tulafono ma tulafono faatonutonu-(1) So o se tulafono po o tulafono faatonutonu ua faia po o faatagaina e le Fono a le Iunivesite Aoao o Samoa i lalo o aiaiga o le Tulafono o le Iunivesite Aoao o Samoa 1997 ma le Fono a le Aoga Faapitoa o Matata Eseese a Samoa i lalo o le Tulafono o le Aoga Faapitoa o Matata Eseese a Samoa 1992/1993:

(a) E faaauau pea ona faamamaluina e faapei ai na faia e le Fono; ma

(b) E mafai ona teuteuina ma soloia e tusa ai ma aiaiga o lenei Tulafono.

(2) O gaoioiga ma faaiuga uma a le Fono po o le Senate a le Iunivesite Aoao a Samoa po o le Fono a le Aoga Faapitoa o Matata Eseese a Samoa e pei ona sa faia a o faamamaluina le Tulafono o le Iunivesite Aoao o Samoa 1997 ma le Tulafono o le Aoga Faapitoa o Matata Eseese a Samoa 1992/1993 e tatau ona faatatauina e faapea sa faia i le tulaga faaletulafono ma talafeagai.

FAAMATALAGA 1

(fuaiupu 14(2))

FONO

(TOFIGA MA LE TUUA O TOFI)

1. Vaitaimi o le Tofiga

(a) E tatau ona umia le tofi e se sui o le Fono i lalo o le fuaiupu 14(1)(f) mo se vaitaimi e le silia le tasi (1) tausaga; ma

- (b) E tatau ona umia le tofi e se sui o le Fono i lalo o le fuaiupu 14(1)(c), (d), (e), (i) po o le (j) mo se vaitaimi i le va o le tasi (1) ma le tolu (3) tausaga, e pei ona aiaia i totonu o le tulafono talafeagai po o e se tagata po o se faalapotopotoga na tofia lena sui.
- (c) O le tofiga po o le filifilia o sui o le Fono i lalo o le fuaiupu 14(1)(c), (d), (e) ma le (f) o le a tatau ona faia i se faiga e pei ona faatonuina e le tulafono;
- (d) E tatau i se sui o le Fono ua tofia po o ua filifilia i lalo o le fuaiupu 14(1)(c), (d), (e) po o le (f) ona faaaau e avea o se sui seia oo ina tofia le tagata ua soloai atu i le tofi o lena sui, vagana ai ua vave tuua e le sui le tofi i lalo o le fuaiupu 2 o lenei Faamatalaga;
- (e) E mafai ona toe tofia se sui o le Fono o lo o umia le tofi i lalo o le fuaiupu 14(c), (d), (e), (f), (i) ma le (j) mo se umi aupito maualuga e tolu nofoaiga.

2. Tuua o le tofi-(1) E mafai e se sui o le Fono (e ese mai i le Pule o le Iunivesite) ona faamavae mai le avea ma sui e ala i se faasilasilaga tusitusia ua sainia e le sui ma tuuina atu i le Pule o le Iunivesite.

(2) O se sui o le Fono o lo o avea ma sui o le Senate, Komiti Tau Tomai po o le aufaigaluega tau tomai ma faiaoga o le Iunivesite i lalo o le fuaiupu 14(1)(c), (d), po o le (e) ua faamuta ona avea ma sui o le Fono pe afai o lena sui ua faamuta ona avea ma se sui o le aufaigaluega o le Iunivesite.

(3) E mafai e le Fono, e ala i se iugafono, ona faatea se sui o le Fono (e ese mai nai lo le Pule o le Iunivesite) mai i le avea ma sui pe afai o le sui:

- (a) Ua faaalua manino ua gaumativa;
- (b) Ua nofosala i se vaitaimi i le falepuipui;
- (c) Ua le auai e aunoa ma se faatagaga mai fonotaga sosoo e tolu (3) fonotaga sosoo a le Fono; po o
- (d) E aunoa ma se mafuaaga talafeagai, ua le mafai ona tausisia le fuaiupu 2 o le faamatalaga 2 (faailoaina o aia).

(4) E tatau i le Pule o le Iunivesite ona auina atu i se sui o le Fono ua faateaina i lalo o le faafuaiupu (3) se tusi e faatulaga mai ai tuutuuga o iugafono ua faateaina ai lena sui.

3. Avanoa masani-(1) I le noatia ma le fai fuafua i le faafuaiupu (2), afai ua faamuta ona avea se sui o le Fono ma sui o le Fono a o le i faaiuina le vaitaimi o le tofiga o lea sui, e tatau loa ona faatumuina lea avanoa i se taimi vave lava e mafai ai ona faatino, ma e tatau i le sui fou ona umia le tofi mo na o le vaitaimi o lo o totoe o le vaitaimi na filifilia ai le sui ua tuua le tofi, tofia po o le tofia e sui tulaga i le po o le a lava le tulaga e i ai, seia vagana ai o lena tagata ua toe tofia mulimuli ane ai po o ua filifilia e pei ona aiaia i totonu o le fuaiupu 1(b) o lenei faamatalaga.

(2) Afai ua tulai mai se avanoa i totonu o le ono (6) masina a o lumanai ai le faaiuga o le vaitaimi o le tofiga o le sui, e mafai ona filifili le Fono e faapea e le manaomia ona faatumuina le avanoa i lalo o lenei fuaiupu.

4. Tualumaga a le Fono e lē aafia i ni avanoa, ma isi tulaga - E leai se gaoioiga po o se tualumaga a le Fono, so o se Komiti a le Fono po o so o se tagata o lo o galue e avea o se sui o le Fono e tatau ona le aloaia i se tulaga e faapea o lo o i ai se avanoa po o ni avanoa i sui o le Fono i le taimi na faia ai lena gaoioiga po o tualumaga, po o pe afai sa i ai ni faaletonu i le tofiga po o agavaa o so o se sui o le Fono, po o se faaletonu i le usuia o so o se fonotaga a le Fono.

FAAMATALAGA 2 (fuaiupu 20)

FONO (TAUALUMAGA O FONOTAGA)

1. O fonotaga a le Fono-(1) E tatau ona fonole Fono ia le itiiti ifo i le faalua i tausaga faalekalena taitasi.

(2) E mafai e le Faa-Ao Lagolago ona taloina se fonotaga faapitoa a le Fono i so o se taimi ma e tatau i le Faa-Ao

Lagolago ona taloina se fono faapitoa i luga o se manaoga tusingusia e le itiiti ifo na i le tasi vaetolu o sui o le Fono.

(3) Afai e leai se Faa-Ao Lagolago po o afai mo so o se mafuaaga ua le o avanoa le Faa-Ao Lagolago, o le Sui Taitaifono o le Fono ua i ai malosiaga ma tiute tauave a le Faa-Ao Lagolago i lalo o lenei fuaiupu.

(4) I so o se fonotaga a le Fono, o se aofaiga fulisia o sui o lo o umia tofi i lena taimi o le a avea ma aofaiga e mafai ai ona usuia se fonotaga.

(5) Afai e le o auai le Faa-Ao Lagolago po o le Sui Taitaifono o le Fono i se fonotaga, e tatau i sui o lo o auai ona tofia se tasi (1) o i latou e avea ma taitaifono.

(6) O fesili uma e tuuina atu i luma o se fonotaga a le Fono e tatau ona faia i ai se faaiuga e se aofaiga fulisia o palota a sui o lo o auai i le fono ma ua agavaa e palota i lena fesili.

(7) I so o se fonotaga a le Fono o le sui o lo o taitaia lena fonotaga e i ai lana palota mo le faia o se filifiliga, ma, i le tulaga e tutusa ai ni palota, ua ia te ia se palota e faia ai le faaiuga.

(8) Ae vagana ai ua aiaia i totonu o lenei fuaiupu, e tatau i le Fono ona fuafuaina ana ia lava taualumaga..

2. Faailoaina atu o aia –(1) O se sui o le Fono po o se Komiti a le Fono o ia lea ua i ai se aia i se mataupu o lo o iloiloaina po o o le a iloiloaina e le Fono po o le Komiti, po o le a lava le tulaga o le a i ai, e tatau, i se taimi vave lava e mafai ai, ina ua iloaina e le sui ia faamatalaga moni talafeagai, ona faailoaina atu le uiga moni o aia i se fonotaga a le Fonopo o le Komiti.

(2) O se aia ua faailoa atu i lalo o le faafuaiupu (1) e tatau ona faamauina i totonu o mataupu o le fonotaga a le Fono po o le Komiti o le Fono ma e le tatau i le sui, ae vagana ai ua i ai se fuafuaga e ese mai ai a le Fono:

(a) Ona auai i so o se faiga filifiliga a le Fono po o le Komiti e tusa ai i lena mataupu; po o

(b) Auai ai i so o se faaiuga a le Fono po o le Komiti e tusa ai o lena mataupu.

(3) Mo faamoemoega o lenei fuaiupu, ua i ai se aia a se tagata i se mataupu, pe afai o le mataupu e faasino i tuutuuga o galuega a lena tagata, po o se tagata e aiga vavalalata i lena tagata, po o afai o lena tagata, po o se tagata e aiga vavalalata ma lena tagata e i ai nisi lava aia po o ni aia tau tupe i se faiga e lē tuusao i le mataupu.

3. Tufatufaga o Iugafono a le Fono a le Iunivesite-(1) I luga o le pule faitalia a le Faa-Ao Lagolago po o le Komiti Faafoe, e mafai e le Fono Aoa ona faia so o se mea e faapea e mafai ona faia e ala i se iugafono na pasia i se fonotaga a le Fono e aunoa ma se fonotaga e ala i se iugafono ua sainia e le aofaiga o sui o le Fono ua faamaoti mai i totonu o le faafuaiupu (2).

(2) Mo faamoemoega o lenei fuaiupu, e ao i se iugafono ona:

- (a) faapea ua uma ona auina atu pe faaooina atu i sui uma o lo o i ai nei i o latou nofoaga ua iloa o lo o nonofo ai; ma
- (b) E le tatau ona faatuatusi, vagana ai ua logoina le Pule i se faiga tusinga i totonu o le lua (2) vaiaso talu ona auina atu le iugafono pe faaooina atu e faapea ua teena e se sui le iugafono ma e faapea ua manao le sui ina ia talanoaina i se fonotaga a le Fono; ma
- (c) Sainia e se aofaiga fulisia o sui o lo o i ai nei.

(3) Mo faamoemoega o lenei fuaiupu, o faasilasilaga uma o le iugafono ma le faamaoniga po o le teena o lea iugafono e mafai ona faaooina atu i se faiga faaeletoroni, pe afai ua aiaia ai ua faia laasaga atoatoa uma e faailoa mai ai le mauaina ma le tulaga moni o pepa aloaia.

4. Totogifuapauina ma Alauni-(1) E tatau ona totogi sui o le Fono i totogifuapauina ma fua faatatau o totogi e pei ona fuafuaina e le Fono, i le noatia ma le fai fuafua i so o se taiala ua faavaeina e le Malo mo faalapotopotoga a le Malo.

(2) E mafai ona toe totogiina i sui o le Fono o so o se tupe alu talafeagai na faatupulaia e i latou e tusa ai ma lo latou auai e avea ma sui o le Fono.

5. Noataga tau le Tagata - E leai se sui o le Fono o le a tatau ona noatia i se tulaga tau le tagata lava ia mo so o se gaioioiga ua faia po o ua lē faia e le sui o le Fono i luga o le agaga lelei ma e tusa ai o galuega tauave a le Iunivesite po o le Fono a le Iunivesite.

O le Tulafono o le Iunivesite Aoao o Samoa 2006 o lo o faafoeina i le Matagaluega o Aoga, Taaloga ma Aganuu

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono.**